

L Consei General à aproà la Cordanza de program per Fascia

Duc a una, dò na discusion senza polemiches, i conseieres à aproà la destinazion del "Fondo strategich" che spartesc zirca 3 milions e 300 mile euro anter i Comuns de Fascia per 11 intervenc

Sèn Jan - La Cordanza de program per l svilup local de coejon per Fascia, che dezide co destinèr e spartir fora i finanziemenc del Fondo Strategich teritorial, è stata aproèda ence dal Consei general. L'era l soul pont a l'orden del di de l'organism de val che è stat chiamà ite dal president Francesco Pitscheider en lunesc ai 6 de november, e l'é stat portà dant, debatù e aproà senza gran polemiches da duc i prejent te pech più che na ora, a la prejenza del nef secretèr Stefano Nardin, che corirà l'encèria lascèda da Giuseppe De Lucia fin canche no vegnarà fat l nef concurs.

L'é stat la Procuradora Elena Testor a prejentèr e despieghèr avisa duc i passajes de chest pian, pean via da la pruma pèrt, che à portà al Comun general i 913.500 euro vegnui da arvinc de aministrazion dai Comuns de Fascia del 2016 (presciapech 830.000 dal Comun de Moena e 80.000 da chel de Ciampedel) e che è stata destinèda per intervenc en cordanza con chisc doi Comuns. Na picola quota de chesta (€ 77.000) se à jontà ai 3.276.000 euro assegné a Fascia da la PAT aldò de parametres ogetives, forman i 3.352.000 euro del Fondo per projec strategics per duta la val.

La Procuradora à recordà l lonch percors de scontrèdes peà via amò del 2016 con i ombolc, i prozesc partezipatives di "word café" con i portadores de enteress, i desé tematics per troèr fora la strategics e i intervenc concrec per les meter

en दौरa, l "open space" de Soraga avert a duta la popolazion e la partezipazion on line e en ùltima amò la scontrèda de aost te Comun general con i ombolc (o vizeombolc) de duc i 7 comuns, la Procuradora e l'assessor provinzièl Carlo Daldoss.

N lonch lurier de mediazion, valutazion e dezijion che à portà en sostanza a confermèr la spartijon di scioldi per 11 intervenc (v. box) mingol per un anter duc i comuns, aldò del voler che i ombolc aea jà palesà al scomenz: n percors che è stat ence lodà, ma l'à lascià la sensazion che, descheche i disc per talian "la montagna ha partorito il topolino".

Giorgio Mazzel à domanà se e perché che la proponetes di desé no à troà conscidrazion, la Procuradora à responet che chestes l'é la prioritèdes di ombolc e che se sarà a la leta etres finanziemenc se podarà fèr ence vèlch auter e Thomas Amplatz à dit che se cognessa aer l coraje de vardèr mingol più dalonc e sorafora i singoi Comuns. Riccardo Franceschetti à dit che la ressorses é semper states dates ai Comuns e ades, ence se les passa per l Comun general, l'é giust che les seghite a vegnir durèdes per i besegnes di comuns. Amò Manuel Farina à lamentà che l soul projet dalbon strategich e soracomunal, chel de Aloch, aessa merità de vegnir premià de più e sun chest la Procuradora à responet che Aloch à abù da la Provinzia de etres finanziemenc e Franceschetti à jontà che se trata de

n intervent che no l'é demò per Fascia ma per dut l Trentin, e l'aessa cognù vegnir finanzià dut da la PAT.

Amò Armando Mich à dit che la Procuradora merita n aprijiamet per l gran lurier portà a compiment e Mario Deluca à recordà che enveze che demò criticèr ge vel ence aprijèr chi che fèsc, e l'à recordà te chisc tempes de crisa l'importanza del sostegn de istituzions desch l BIM.

A la fin la Cordanza é stata aproèda da duc e la Procuradora à anunzià che a la fin de november vegnarà chiamà ite n auter Consei general. (lg)

11 intervenc finanzié

La soma de € 907.914 va a Cianacei per l nef piazz de Dèlba e semper a Cianacei va amò 194.206 euro per manutenzion straordenèra del stadie de la giacia. Al Comun de Soraga va € 97.103 per l'area de jech e strutures sportive e € 82.538 per l'alestiment de na sala didatica a Malga Boer.

Moena ciapa € 257.323 per l completament de l'area de Navalge

e 242.758 per l miorament del teater, € 194.206 per l ciamp da balon e € 113.611 l troi per jir a pe e co la roda sa le Cene.

Per Vich l'é pervedù € 194.206 per l projet del parcheje publiche e per Poza € 776.825 per l Ski Stadium de Aloch. En ùltima € 291.309 va al Comun de Mazin per mudèr fora la lumes publiches.



N moment de l'ultim Consei general.